



Illes diesch megliers dalla disciplina 10 m tschentau, tierz da dretg Corsin Derungs.



Guido Sgier en acziun durant la concurrenza.

FOTOS MAD

Campiunessa Yvonne

Illes Tiradurs sportivs Surselva tuornan cun aur dil campiunadi svizzer

■ (anr/abc) La davosa fin d'jamna ein ils tiradurs sportivs dalla Svizra s'entupai a Berna als campiunadis singuls e da grupp ella disciplina buis d'aria e pistola. Yvonne Margreth da Castrisch ha gudignau per la tierza gada il tetel ella concurrenza 10 meters tschentau. Aur ha ella vitier era gudignau cun Guido Sgier e Corsin Derungs culla grupp Glion Surselva. «Al campiunadi d'uonn hael jeu fatg ina nova experientscha», commentescha Yvonne Margreth sia participaziun al Campiunadi svizzer 2019 dils tiradurs sportivs. Ella ei viagiada al final a Berna cun sis camerats che fuvan sequalificai ella prerunda a casa. Margreth ha s'udiu tiels favorits. Illes dus onns vargai fuv'ella daventada campiunessa svizra ella disciplina 10 meters tschentau. El stan a Ruschein eis ella sepreparada ille meins vargai, sco adina, durant il trenament d'unviern. Cun in sentiment luc eis ella viagiada vendergis al campiunadi svizzer a Berna. Gaudi Coray dalla Carrossaria Coray a Laax ha puspei mess a disposiziun in bus pign pilviadi, igl ei ina contribuziun da sponsur ch'ills Tiradurs sportivs Surselva apprezieschan fetg. Grazia a quei bus san els viagiagiar comunablamain e formar vera equipa.



Yvonne Margreth ei returnada cun duas medaglias d'aur dil campiunadi svizzer.

bien trenament pigl unviern per tiradurs che settan la stad 50 e 300 meters. Ins trenescha d'automatisar mintga siet, igl ei in rinforz mental. A quella categoria astgan tiradurs ch'han contonschiu il 55avel anniversari separticipar. Sco quei che l'Uniuon svizra da tir constatescha vegn la disciplina «10 meters tschentau» pli e pli populara. La campiunessa da Castrisch s'auda tier la pionieras e promoturas da quella.

L'experientscha nova ch'ella ha fatg uonn el stan da sittar analysescha Margreth suandontamein: «Jeu hael pigliau

tema da mi'atgna curascha.» Illes emprems treis siets ein numnadamein stai: 10,8, 10,9 e 10,8. La segirtad maximala ha fatg vegnir nervusa ella igl emprend. Il maximum ei il 10,9, quel corrispunda ad in 100, 10,8 ei in 99. Culs suandonts siets ei sia forza mentala lu semussada: La tiradura sportiva ha focussau, tratg flad, laghegiu schuber, schau luc, mirau suenter, sittau cun ritmus e concentrau il mument. Siu concurrent pli vischin ha fatg il medem. Cun ina differenza minima da 0,1 puncts ha Renato Schulthess da Burgdorf denton buca pudiu dumignar

ella. Margreth ha gudignau la medaglia d'aur cun 312,8 puncts avon Schulthess cun 312,7 puncts. Ella medema disciplina ha Corsin Derungs da Camuns sittau 310,7 puncts, el ei daventaus tschunavel da quella concurrenza svizra.

Aur per Glion-Surselva 1

Guido Sgier da Sagogn fuv sequalificaus uonn per la concurrenza dils veterans seniors. Igl onn vargau fuv el returnaus en Surselva culla medaglia da bronz. Gudignau quella ha uonn il vicecampiun mundial da 1982, Pierre-Alain Dufaux (1949). Illes onns 1984 a Los Angeles e 1988 a Seoul ei quel separticipaus als Giugs olimpics. Vendergis a Berna ha Dufaux sittau 312,9 puncts. Il victur digl onn vargau, Ruedi Siegfried (annada 1938), ei daventaus quart. Cun 308,8 puncts ei Sgier daventaus otgavel ed Ignaz Caduff da Ruschein 12avel da 49 classai.

La concurrenza da grupp il suentermiezgi han lu ils tiradurs dalla Surselva dominau. Il menader dalla delegaziun sursilvana a Berna, Placi Caviezel, haveva seleziunau Margreth, Sgier e Derungs per quella concurrenza. La grupp Glion-Surselva 1 dils Tiradurs sportivs Surselva fuvan sequalificai e seprofilai gia el stan a Ruschein. A Berna ha Margreth sittau in total da 312,1, Sgier 312,0 e Derungs 308,7 puncts. Quei dat 932,8 puncts. La medaglia d'argien ha la grupp Gstaad-Saanen 1 gudignau cun 930,8 puncts, suandai da Vully-Broye 1 cun 930 puncts. Il novavel rang ha la grupp Glion-Surselva 2 contonschiu culs tiradurs Tarcisi Cadruvi, Placi Caviezel e Robert Studer. Els han sittau in total da 920,5 puncts. Sco quei che la gliesta da rangaziun finala cumprova ha era quella grupp sittau ferm.

0,1 puncts differenza

Avon in onn haveva Margreth giu in curios sentiment durant il viadi al campiunadi svizzer. Ella eri buca nervusa, ha ella raquintau, denton zatgei schischevi tuttina sil magun. Ella gronda halla polivalenta dall'armada a Berna ha ella lu defendiu cun success il tetel da campiunessa svizra. Vendergis vargau ei la campiunessa dubla puspei s'installada davon la schiba, en concurrenza fuvan 26 umens e quater dunnas. Sittar 10 meters tschentau culla buis d'aria cumprimida ei in



La delegaziun sursilvana a Berna: davon da sen. Tarcisi Cadruvi, Placi Caviezel, Robert Studer ed Ivan Caduff; sura Ignaz Caduff, Corsin Derungs, Yvonne Margreth e Guido Sgier.

Guido Sgier, Yvonne Margreth e Corsin Derungs: La grupp Glion-Surselva 1.



MUSTER

Il davos film dil Cinema d'unviern 2019

(anr/hh) La retscha da films dil Cinema d'unviern 2019 el Center sursilvan d'agricultura a Mustér/Salaplauna va a fin. Questa sera vegn la davosa producziun mussada. Igl ei il film «La mélodie», ina historia ord in liug datier da Paris. Cura ch'il scolast da violina Simon Daoud (*Kad Merad*) surpren sia piazza vegn el confruntau cun affons maltrats, nudisciplinai ed aggressivs. Quels affons duess el animar da sunar violina. El vegn sustenius dil scolast Fahridd Brahimi (*Samir Guesmi*). Sulettamein il giuven Arnold (*Rénezy Alfred*) muossa interess vid l'instrucziun e la musica. El sviluppescha carezia per siu instrument ed exercitescha a casa el surcombras. Il scolast da violina daventa pertscharts dil talent dil giuven musicist ed emprova da promover el. El emprova denton era d'esser empauet il bab da quei mattatsch che munchenta siu agen bab. Ella classa dat ei lu in incap. Simon tila ina entuorn las ureglias ad in scolar aggressiv ch'ha offendiu el. Ina perstgisa migliura buca cumpleinamein la situaziun, mo procura per novas relaziuns. La classa ha vonzeivi plascher da far musica. Ina gronda sfida ei sin ruccha, numnadamein il concert cun auters giuven musicists ella filharmonia da Paris. Mo Simon vul capitular e savess neziagar la schanza per ina turnea da concerts. *Rachid Hami*, oriunds dall'Algeria, ha meinau reschia.

Oz mesjamna, ils 27 da fevrer 2019 el Center sursilvan d'agricultura a Mustér/Salaplauna. Naven dallas 19.30 vegn purschiu ina bar, il film entscheiva allas 20.00. Entrada libra, collecta.

Mazlaria da Vrin e ses 20avel anniversari

■ (rtr) Il matg 1999 è la mazlaria a Vrin vegnida inaugurada. Ort onns planisaziun hai duvrà fin che tut è stà uschè lunsch. Bliers problems han stuì vegnir schliads avant che la visiun dals iniziants è ida en vigur. 400'000 francs era l'emprima calculaziun dal project. Custà ha la mazlaria la finala il dubel, numnadamein passa 800'000 francs. Suentar la construcziun da la mazlaria han *Linus e Florentina Tomaschett* surpiglià la gestiun dal manaschi ch'els han alura manà ils emprims 15 onns. Dapi il 2015 mainan *Hermann Huld* e sia partenaria *Melanie Notbacher* la mazlaria a Vrin. En media vegnan 400 animals ad onn elavurads. Quai correspunda a 30 tonnas charn. Duas terzas dals animals vegnan fatgas per mauns dals purs, cun il rest fa el products ch'el venda privat en sia stizun a Vrin.

reclama

Sonntag
3. März 2019
ab 18 Uhr

Churer Fasnachts-umzug

auf TV Südostschweiz